

四庫全書

集部

欽定四庫全書

石倉歷代詩選卷二百九十

明 曹學佺 編

明詩初集十

王翰

言懷呈董仲綸訓導

南山有佳樹衆鳥寒相依佳樹何團圓歲暮心不移高
枝聊可嬉低枝安我棲有巢不能底敢望故林飛古劍

光射斗陸沈還不朽欲淬使之利持此恐傷手不若兩
錢錐反以得取售向市空抱歸令人顏甚厚蛭蚶涎自
濡蛟龍噓成雲蛭蚶以自足蛟龍或可馴大小各逍遙
鵬鷄何足論方崔秋氣高天宇何蕭騷主人有西成客
子免焦勞道途何縱橫使我顏色消世故多紛紜萬事
徒瞖瞖一笑欲拂衣青山頻見招

雪晴齋居

停午陰風生向夜星彩沒入杯湯已冰挾纊肌欲粟始

見微霰零俄驚素花歇皓色射牕楮輕聲碎軒竹雅琴
無秦箏佳名勝醺醪愛此清夜吟共剪西牕燭

鑄鏡行

妾念嫁時新鑄鏡鑄成團圓秋月色自夫從軍藏入匣
鏡面已昏妾面隔紅顏落為霜葉枯綠髮已隨秋草白
妾顏雖改心不轉手攜圓鏡情脈脈昨日書來在柔乾
新衣未寄舊衣單秋風入戶吹羅幌妾身未衣念郎寒
何時降王來款塞罷負長戈却征鎧歸來對鏡試春衫

團鏡重磨妾掃黛

題上清張真人畫陰厓長嘯圖

穹厓壁立三千尺萬挺蒼宮並厓立半空垂瀑似飛龍
怪石秋陰護苔色水邊鵲立是神仙意欲飛空凌紫烟
白雲不隔華陽洞綠波遠入桃花源羽衣翩翩無覓處
萬壑千巖銷烟霧龍吟虎噉下青冥天風振落三花樹
上清宮中仙子家興來繞筆飛烟霞蘇門一笑聞千古
但恨不得隨仙槎

城南行

城南陌上東西路戴勝飛來桑葉綠綠桑枝低挂羅袂
佳人採桑春日曛陌頭騎馬年少客新着春衫面暫白
翠鞭時拍馬韉吟吟高調急驚春心女郎遙隔桑隴聽
無由一笑開春襟低眉躑躅立多時回頭轉盼情亦深
妾為盧郎婦君有秋胡金妾以節奉夫君以金奉母好
置美酒壽高堂君搥鼓兮妾萬舞援箏莫彈陌上桑箏
聲哀鳴兩心苦

棠梨墓歌

棠梨花白春似雪棠梨葉赤秋如血
春來秋去棠梨枝長夜漫漫幾時徹
明月照青鏡香霧鬢翠鬟草寒虫噴噴
花落鶯闌闌青燈耿玄閱黃土埋紅顏
楊柳樓頭紅粉歌舞罷春風飲翠娥
莫厭樽前金叵羅君看岡頭宰堵坡

龍江別意

送客都門道旗亭酒一樽
雨餘芳草合風定落花繁
曉樹連雲暗春江帶雨渾
明朝定相憶遙望一銷魂

初冬

值此春風候，頑雲凍不銷。
風威連夜動，雪意挾寒驕。
官冷裝寒薄，川回得信遙。
山中多故舊，何用作書招。

題山居幽趣圖

幽人愛岑寂，林下築幽居。
觸石雲生谷，通泉溜決渠。
鶴眠春院靜，猿去晚林疎。
時有採芝客，商歌振碧虛。

山居幽趣繼前詩句成

買得青山好，林居事事清。
晚窗分竹色，夜枕落泉聲。
露

滴琴書潤雲隨杖几生未能脫簪笏猿鳥漫忘情

過湖口縣

澄江東去急南槩入湖深林密藏秋雨山高倒夕陰麗
譙臨小縣佛閣出遙岑當趁風濤便無由得賞心

過九江府

早發潯陽岨秋風鴻雁高谷容通窈窕江色變蒲萄堅
壁雄千雉危檣艤萬艘琵琶亭下水猶似響檀槽

題賈原善典寶寒潭漁隱圖

君家舊在寒潭住故寫新圖寄幽趣
木落秋山潭水空
猶把長竿倚溪樹角巾野服身翩翩
髣髴當年孟浩然

次韻我眉山

霧作衣裳雲作屏玻璃萬頃著娉婷
望夫石上偏多雨
織女河邊欲隕星
蟬竦夏涼收淺絳
蟾蜍秋冷抹長青
可憐天際微燁處六國興亡一夢醒

和黃體方伴讀新蟬韻

滿地殘花過雨天槐陰庭院響新蟬
輕敲金奏當窗外

閒撥銀箏向枕邊
曉露吸殘青草岼
晚風吹出綠楊烟
家山深處林亭好
曾被繁聲聒醉眠

秋信

寒來消息是誰傳
金井梧桐一葉先
殘暑已消團扇底
新涼纔到短檠前
問愁多在蛩聲裏
寄遠常從雁影邊
流浪浮生渾不覺
知機林外有鳴蟬

送成紀善省親關中

端門賜告得馳歸
雪霽沙溝淨不泥
寒度雁聲天遠近

早行林影月高低河源出塞金繩直嶽色連雲翠蓋齊
戲綵高堂稱壽畢歸期先報鄭關西

和王道錄韻其人嘗住茅山

兩首新詩墨色濃飄然逸氣有仙風
蓼床清夢飛為蝶竹杖通靈化作龍
商皓芝田雲更白葛公丹井水無紅
他年勾曲尋真去會向雲邊問小童

雪禁體物

彤雲垂地四茫茫微霰初零集下堂
重壓竹梢還欲折

密封梅葉不禁香氣凌杯酒渾無力凍澀琴弦已不張
擬學歐公吟白戰挑燈癡坐惱詩腸

和黃體方伴讀雪中即事

凜凜陰風捲暮霞朝看庭樹總開花漁舟一葉迷烟渚
獵騎千羣踏晚沙淡抹牆腰疑月色旋添池面結冰華
乾坤萬象俱清絕何用柴桑五柳家

和劉菊庄劉先生韻

中條西畔築高亭夜讀林臯燭散星雨足小園催種藥

雪埋孤硯為窮經疎梅得月連窗白芳草和烟滿徑青
擬和小山招隱句他時把酒共君聽

春雪

一冬天氣喜溫溫留作春寒故惱人密灑紙窗疑是雨
旋鋪芳徑不生塵舞同柳絮能爭巧飛入梅花竟亂真
賦罷兔園看霽景梁臺草色一番新

送通許張知縣考滿

繁臺草綠河流漸正是郎官考績期昔向斗牛占劒氣

今騎驄馬勸農時
雨餘梁苑花如錦
風暖隋隄柳拂絲
比到神京春正好
蓬萊宮殿碧參差

送河南王府判考績

三年佐治住東周
又及南轅報政秋
千里暮雲迷汴水
一羶疎雨別嵩丘
鳳臺曉上留新句
虎監春行訪舊游
料得歸期在初夏
杖藜携酒待仙舟

雪夜聯詩句圖

徐旭楊景
華黃體方

三子清標骨已仙
要將大雅繼唐賢
詩吟柳絮春風外

人在梅花夜月邊
光奪蘭膏微有暈
氣凌茶竈濕無烟
想應一榻團欒處
絕勝山陰訪戴船

陵陽春晚圖

為審理賦

陵陽山下林亭好
更有高人為卜隣
幾箇修篁鳴翠雨
一溪流水隔紅塵
靈龍過礪能迎客
幽鳥到窗如喚人
少住梁園驚歲月
春來頻覺夢歸頻

舟中望廬山

宮亭風靜鏡光平
回望匡廬翠靄凝
寶劒插天霜雨立

香爐照日紫烟升，侵雲鳥道還通谷。
隔水僧房祇見燈，擬向中峯看瀑布。
生情高岫白雲興。

送監稅李公考績

幾年携杖看山心，回首離情滿素襟。
畫鷁衝開江水綠，玄猿啼斷越山深。
長干沽酒臨風酌，采石題詩對月吟。
復職歸來春欲半，梅開花盡已成陰。

憶平陸舊遊

金鷄山頂鄧家園，乘興來遊坐水邊。
柿葉染霜圍錦帳，

菊花承露散金錢溪頭恠石如人立洞口蒼苔待我眠
何日再同三二友傾壺濁酒送殘年

雙鶴

愛爾仙姿久出胎如何困滯在塵埃他山松頂足明月
何處水邊無綠苔引頸有時思遠漢戀恩終日立空街
自今便好仙山去莫為羣鷄生怨猜

秋懷

秋窗昨夜秋風起百感心成一寸灰千里雁來書未至

五更虫語亭初回地連洛汭浮雲斷山接滎陽夕照開
何日黃河航一葦中條山頂望青臺

鬪鷄亭秋望

扶筇獨上鬪鷄亭俯瞰平郊望眼明路入洧川寒曉斷
山連新鄭暮雲橫煙生茅屋人家少風起沙岡雁陣驚
況是老年多抱疾豈堪登眺重傷情

中秋和趙孟弘

銀漢昭回勢欲流瑤臺露下冷光浮輕風捲雨作佳夕

皓彩射空生素秋老子據牀多逸興
嬋娥依檻不生愁
此宵常被陰霾悞來歲高堂得賞不

自涉至黎城山行即事

涉城城下渡衡漳一道青林百里長
雲表連峯馳健馬
途中亂石卧羣羊溪頭雨過莓苔滑
谷口風來藥草香
鞍馬倦人聊少憇山蟬無數噪斜陽

久雨述懷

秋來連日雨泔泔入夜悶愁苦不禁
冉冉綠苔沿砌長

蕭蕭黃葉擁門深
匡時踈拙無奇策
憂國衰殘負此心
長夜不眠空倚枕
挑燈時復一長吟

涑水

一派靈源滾滾來
風搖錦浪岼花開
橋分野色行人去
雨沒沙痕釣客回
秋淨霜澄明似鍊
春深烟染碧如苔
善君自有朝宗志
莫怪磯頭鷗鷺猜

昭君怨

回首長門淚暗流
羶城春似漢宮秋
琵琶強勸單于酒

酒正濃時妾正愁

南陌詞

南陌東邊楊柳枝
長條拂水綠參差
行人不是枝頭絮
也有無風到地時

欽定四庫全書

石倉歷代詩選
卷二百九十

石倉歷代詩選卷二百九十

欽定四庫全書

石倉歷代詩選卷二百九十一

明 曹學佺 編

明詩初集十一

孫賁

行行重行行

岐路一尊酒送君久遠行
交持未及竟絲管激哀聲
冉冉歲華暮悠悠雲氣征
馳車戒往路惻惻傷我情
我情

默已傷歡愛不可忘昔為春花妍今為秋草芳秋草芳
有時夫君見無期獨宿坐長夜淚落如綆縻白日儻回
照孤懷君所知

今日良宴會

南園有佳人窈窕桃李顏容華一何麗顧盼生光妍進
退禮自防秉德幽且閑良媒候嘉意君子希令言鴻鴈
念儔侶睢鳩鳴河間盛年若流水隱居獨長嘆

西北有高樓

華月散高樹列曜何參差流光射結綺思婦慘中閨良
人涉遠道感嘆夜何其清聲發妙曲宛轉有餘哀妙曲
固可聽餘哀知為誰春至桃李妍歲暮華色衰居然獨
處廓顧影久徘徊

明月皎夜光

離離谷中樹燦燦春華芳枝葉何盛茂忽然隨風揚流
光有凋換物理安可常擾擾路傍子哀歌使我傷杪秋天
氣肅白露結嚴霜攬衣不能寐起視夜何長明月出東壁

衆星羅縱橫歲暮鷓鴣鳴百草青自黃遠道者誰子馳車登
太行太行鬱差我天路無津梁興言念同志涕下沾我裳
庭中有奇樹

洞庭木葉下悲吹激微寒美人倚修竹凝睇九疑山層
雲沒遠巘軒車絕來還既懷文玉佩復采澧水蘭結言
欲有贈天路遠險艱沉憂坐將老歲月銷令顏

迢迢牽牛星

北風吹雪霰同雲四垂陰惠而能好我寄以瑤華音蟋

蟀入床下晨風飛北林川梁限楚越思子間傷心

東城高且長

咸陽九原上昔日冠蓋塲秋風動禾黍曠野浩茫茫大
化無停留榮耀安可常烟雲迷五柞榛棘沒長楊時運
理則然來者徒自傷所以放志意酣歌稱我觴鳴箏縱
繁響緩此幽思長回車長樂坂將去復彷徨願為雲中
鴈寥廓恣高翔

凜凜歲云暮

江潭十月交霜露
萃郊原卉木無留榮
百草日夜乾鴻鴈
鳴洲渚猿狖悲空
山閨人念遠道撫
節涕汎澗川梁一
睽隔魂夢夜不安
厚愛君詎知新恩
忘前懼忠誠不見
白剖心良獨難望
望千里道無由生
羽翰

客從遠方來

妾有錦繡段文采
裁為衾上羅連理
枝下織雙飛禽惜
此嫁時物珍之比
南金良人隔山海
歲月亦已深願因
飛鴻翼寄以表此
心

南園

詩社良讌集南園清夜遊條風振絡組華月照鳴騶高
軒敞茂樹飛甍落遠洲移筵對白水列燭散林鳩雅興
殊未央旨酒詠思柔玉華星光粲錦綵雲氣浮麗景不
可虛衆賓起相酬長吟間劇飲楚舞雜齊謳陵陽杳仙
駕韓衆非我儔聊為徇時序娛樂忘百憂

道上行

高林翳當道莽莽秋向深回風亂落木驕陽亦化霖我

行泥塗中淒厲入我襟白日晦平陸玄雲生夕陰歸鳥
靜不飛瞑猿長哀吟感此時景邁况將陽月臨不怨行
路難所嗟歲駸尋悲鳴激楚奏思苦調南音鍾儀久已
死誰復知此心

期羅浮蕭鍊師不至

石室松桂秋涼風滌殘暑柴門敞空曲曠夕懷仙侶巢
笙久不至鶴馭今何所朗月流清輝山中幾延佇

南園懷李仲脩

幽獨攄雅懷逍遙步南園繁卉耀陽德嘉木秀春暄時
暘燠土膏流澌漲通川荃蘭揚朱英山礬炫文軒垂楊
列曲渚鳴鳥何闐闐展席芳醕陳開觴羣物妍顧瞻失
儔侶高情寄所宣馳思望遠人遙在伊洛埏賢勞事會
計日昃不遑安聊復縱長吟引領希令言何能此會合
宴樂紓我虔

寄王給事佐

休沐展幽眺步出鍾阜阿卉木盛春風淮水揚素波泛

泛波上鷗游沫鮮羽儀端坐愧此鳥長遊成蹉跎安得
理歸櫟翩然解珮珂揚舲過關右鼓枻入江沱友于事
讌集物候方陽和酌酒南園上與君同笑歌

送王給事南還

良時幸一遘嘉運難再逢流序若飛電儻忽歲云終美
子瑚璉器林麓隱高蹤適此徵俊彥奮起惠家邦觀光
克上賓恩禮赫以隆金門拜給事百辟肅敬恭迴荆忽
欽翼言歸滄海東昔若雲中鳳今若南飛鴻出處各有

道顯晦詎能同微君慚苟祿仰首慕清風文成德亦著
節立道斯崇願言秉風志永保貞素躬

秋風詞

秋風嫋嫋天氣晶寒虫唧唧霜露零白雲孤飛鴈南征
念君歲闌遠遊行長年驅馳竟何成閨閣盼望空乳乳
哀求傷秋百感生感極涕淚沾衣纓何人月高彈鳴箏
繁絃急絲攪離情銀河橫天湛空明哀猿寥寥共淒清
微禽安栖夜不驚夫君胡為未遑寧

將進酒

青瑤案上離鸞琴一徽已直千黃金開樽花下對明月
欲彈一曲還沉吟沉沉復吟幾低首彈商聲勸君酒雍門
風樹春蕭蕭地下田文骨應朽

織婦詞

吳中白紵白如霜春風入衣蘭麝香二月城南桑葉綠
新蠶初出微於粟採桑日晏携筐歸夜半懸燈待蠶熟
繰成素絲經上機兩日一疋猶苦遲織成裁衣與郎著

妾寧辛苦教郎樂家中貧富誰得知郎無衣著他人嗤

古鏡詞

貧女池邊得銅鏡鄰媼歡呼喜相慶持歸鉛粉三日磨
龍影模糊面猶瑩機中剪素為鏡囊染絲繡作雙鴛鴦
橫看豎照心不厭借挿金釵學上堂廢銅雖獲惜於寶
無錢買新舊亦好誰識青樓金鏡開珍珠綴匣瓊為臺
南園歌贈王給事彥舉

昔在越江曲南園抗風軒羣英結詩社盡是琪林仙南

園二月千花明當門綠柳啼春鶯羣英組絡照江水與
予共結滄洲盟滄洲之盟誰最雄王郎獨有謫仙風狂
歌放浪玉壺缺劇飲淋漓宮錦紅青山落日情未已王
郎拂袖花前起歡呼小玉彈鳴箏醉倚庭梧按宮徵哀
絃泠泠樂未終忽看華月出天東裁詩復作夜遊曲銀
燭飛光白似虹當時意氣凌寰宇湖海詩聲萬人許酒
徒散落黃金空獨卧茅簷夜深雨分飛幾載遠離羣歸
來城市還相親他時重賞舊遊處蒼烟萬頃波粼粼

廣州歌

廣南富庶天下聞
四時風氣長如春
長城百雉白雲裏
城下一帶春江水
少年行樂隨處佳
城南南畔更繁華
朱簾十里映楊柳
簾櫳上下開戶牖
閩姬越女顏如花
蠻歌野曲聲咿啞
荷我大舶映雲日
賈客千家萬家室
春風列屋艷神仙
夜月滿江聞管絃
良辰吉日天氣好
翡翠明珠照烟島
亂鳴鼉鼓競龍舟
爭覩金釵鬪百草
遊冶留連望所歸
千門燈火爛相輝
遊人過處錦成陣

公子醉時花滿堤扶留葉青蜺灰白盆飣檳榔邀上客
丹荔枇杷火齊山素馨茉莉天香國別來風物不堪論
寥落秋花對酒樽回首舊遊歌舞地西風斜日淡黃昏

羅浮歌寄李長史

亭亭西樵峯宛在南海湄日華麗仙掌影漾金銀池我
昔扁舟恣長往凌風浩蕩烟霞想尋幽更欲探神奇復
向羅浮事仙賞仙家三十六洞天羅浮曷與滄洲連丹
霞射影四山靜羣真環珮來翩翩藥珠之峯數千丈君

時與我緣蘿上水簾直下飛晴虹萬壑天風度流響山
中劉郎司玉臺仙書授我琅函開心如明月烟虛照身
與浮雲同去來此時會合那能再塵土分飛忽三載我
行奏賦登金門君亦乘輶渡淮海淮海迢迢烟樹深相
思歲晚結愁心長風萬里碧雲遠何由一寄還山吟山
中洞房春寂寂山中之人長嘆息松花酒熟人不歸瑤
草春風幾回碧

驪山老妓行補唐天寶遺事戲效白樂天作

秋風楊柳凋金縷冷露芙蓉落芳渚寒香晚色何所如
驪山唐姬教坊女蛾眉淡掃山遠碧蟬鬢半拖雲亂吐
時粧無復新妖嬈曩態猶存舊嬌嫵我昨咸陽縱冶遊
冶遊爛熳遍西州青山直抵雙龍闕綠水橫過五鳳樓
南國佳人金錯落長安公子玉驄駟銀壺送酒青絲絡
皓齒當筵白雪謳琵琶橫笛空聒耳唐姬搗箏妙無比
請彈一曲久含羞呼喚百迴方強起移柱相參鴈成列
調絃未就人先喜俛首斜拖珠步搖向人高露春纖指

樓高韻發響泠泠急管悲歌一霎停初聽乍如風雨至
再彈還作鳳凰鳴清如玉女鈞天奏壯似雕戈出塞聲
澗水帶冰時哽咽春雷震石忽憑陵憑陵未已旋清悄恍
惚漸凝聲漸小四座無言俱寂寥餘音已斷猶縈繞溶溶
宛宛復悠悠切切淒淒還窈窈深閨斷蚓怨寒宵淺谷
嬌鶯破春曉纏綿萬恨與千愁婉意柔情不肯休蔡琰
胡笳悲紫塞班姬團扇掩清秋樓前皓月明如練天外
行雲凝不流促拍未終南內曲新腔忽過小梁州梁州

一摺月向午唐姬此時心獨苦銀甲悲深不忍彈哀腸
斷盡無由語低籠翠袖搵香淚翻使歡娛變淒楚訴盡
平生富與貧可憐人世今成古憶昔開元正太平兒家
生長在天京十三學舞曾驚座十四搗箏能擅名玉貌
羞花長窈窕宮腰怯柳更輕盈春寒不離鴛鴦枕日晏
方開孔雀屏五陵年少秦川客爭愛兒家好顏色殢雨
尤雲最惱人追歡買笑寧論直聲名每出流輩上風致
獨覺傍人惜承恩況得登掖庭宛轉隨龍侍君側海晏

河清久息兵四夷賓貢盡充庭炎方已見來丹荔交趾
還聞進雪鸚耀日香車連紫陌飛雲畫棟列朱甍空濛
一片笙歌海浩蕩三春錦繡城驪山山上多樓閣萬戶
千門通碧落大駕深居在九重四時多暇惟行樂已營
連昌勝結綺復起芳鳳齊花萼壺飛玉女遞更籌舟戲
金龍動鱗角侍臣傳勅選嬌容特許兒家步輦從宮扇
影移花雨外山呼聲沸錦雲中千株火樹爭明月萬炬
金蓮鬪彩虹子夜歌詞翻白雪霓裳舞隊散旋風歌停

舞歇徘徊久銀箏獨進纖纖手明眸麗質一當前含顰
美人俱在後數聲清響動絃索八面涼風開戶牖艷曲
新裁萼綠華中官催賜葡萄酒年年秋月復春花多在
宮中少在家嬌笑不愁宮監怒艷粧長得阿姨誇朝遊
複道瞻天表夜步西廂拜月牙闌草經春陪虢國藏闔
竟夕伴昭華韶光忽逐流年轉野鹿銜花上林苑鐵騎
東來鳳闕空金根西狩蛾眉遠上方無復聽宣召新籍
寧辭避差遣約臂金環雨雪寬凌波錦襪風埃塞星移

物換得無情得向驪山悄地行紫禁無人芳草合瑤階
雨過綠苔生歌臺索莫花千樹舞榭蒼涼月半檣繡閣
秋陰連瑣闥銅仙清淚落金莖高梧隕翠蓮飄玉太乙
鈎陳看不足百子樓寒霧影昏長生殿古烟光綠宮牆
瓦落見蓬蒿輦路塵生走麋鹿舞馬雕牀惱夢思花奴
羯鼓驚心目故宅新人作宴遊內家紅錦別纏頭珠簾
綉柱俄成夢鳳管龍笙總是愁舊曲聞來眉自歛盛年
說著口應羞飛蓬短鬢難禁白老屋踈茅不奈秋舞衫

長借鄰人著同伴相呼只推卻臉玉香隨翠靨消淚珠
暗逐燈花落憂來倒挿黃金鳳裏時彈白翎雀百感
中來不自由芳心一片從誰托唐姬言語一何長句句
淒其字字傷滿座聞之聲唧唧沾巾我亦為浪浪滄桑
轉瞬誰能識富貴浮雲安可常覽鏡每聞悲素髮舉杯
長欲勸流光唐姬亦莫懷抱惡自古佳人多命薄傾城
西子逐鴟夷絕代明妃嫁沙漠尊前有酒且歡笑身外
閒愁付冥漠皎月秋來幾度圓穠花春盡從渠落唐姬

攬涕復陳情請作驪山老妓行桃李風前霜月下長吟
詎足慰平生未因水上琵琶語那識江州司馬名為爾
臨風歌一曲百年哀怨起秦箏

題高彬白雲山房手卷

高彬昔年喜學武七尺長驅力如虎徃昔追強過營門
日來從戎事藩府錦袍白馬金連錢騎將校獵城南邊
鼻頭火發不知熱耳後風生猶著鞭秦楚山川歲華改
萬人零落惟彬在腰間不挿黃金符卻向詞林學文彩

白雲遠在藩府陰馳驅足馬恣幽尋秦臺古樹挂秋色
堯澗冰泉清客心娛遊日夕歡不足更傍山腰結茆屋
多種琅玕引鳳凰大開門徑邀麋鹿雨龍歸洞白雲閒
鸞鷟綿聯窻戶間月映餘輝長不夜雲拖晻靄似巫山
山中白雲如白石旦暮與雲同枕席雲來萬樹似開花
雲去千巖同一色何年作客帝皇州卻按新圖憶舊遊
紅樹不知淮水晚白雲遙認故山秋故山白雲長自好
且莫看雲被山惱他年謝病解朝衣我亦從君拾瑤草

戲贈端孝思

君不見長安遊俠兒銀鞍白馬青春時
朝出呼盧夜飲酒美人娟娟照窓牖
若為君作梅花仙不隨桃李爭春妍
獨夜可憐邀月飲一春長是背花眠

次武昌

大風吹船如馬走船頭水聲作牛吼
挂帆初發岳陽磯轉枕俄灣武昌口
武昌城頭黃鶴樓飛簷遠映鸚鵡洲
漢陽樹白烟景濕行人如鷗沙際立
江南風土寒氣遲

金匱山房集卷一百九十一
居人九月著絺衣酒旗臨江開竹屋當壚小姬能楚曲
蜻蜓船尾旋回風今夕停船酒家宿

題蘇名遠畫竹圖

蘇郎寫竹如寫帖珊瑚為枝篆籀葉寒梢不及三尺長
遠勢直與青冥接青冥不辨西與東雲光竹色俱空濛
飛廉排山振鶯鶯霹靂迸火驚蛟龍奇搜寧獨竹色老
竹傍有石仍更好想其落筆當酒酣人間屏幃愁絕倒
近時吳興趙子昂最能寫竹窮青蒼蘇郎晚出繼芳躅

湖海二妙相輝光十年不到瀟湘浦環珮空懷玉簫女
相期共泛書畫船濃墨淒迷掃烟雨

雨中寄友

客有還家夢空山雨正來寒生衣袖薄風急樹雲開掩
戶坐終日思君重幾迴琴邊有逸興能復醉深杯

山中寫懷

野館愁俱寂空林日未斜看雲偏憶母為客久辭家獨
自嗟萍梗非關戀物華晚來山雨裏猶見杜鵑飛

光孝寺

雨葉菩提寺
天花簷蔔林
塵機方外息
幽趣靜中深
野色連香積
秋聲雜梵音
隨緣僧供裏
予亦長禪心

酬王道原

鳳池鴛鴦侶
幾載此南遷
柳色迎征棹
花香憶盛年
訟庭栽白蠟
官步到紅船
我亦金門客
逢君思黯然

過東阿懷雪蓬

故人今不見
孤客倩誰憐
事業清時困
名聲舊邑傳
紫

髯風獵獵烏帽月娟娟
倘遂幽園約河橋共晚年

荔灣漁隱

家住半塘曲沿迴復幾灣
門前荔酒熟屋後釣舟閒
杳邈熊羆兆空濛虎豹關
如何三里外便是五湖間

翠筠軒為源上座題

篁竹本脩脩僧房分外幽
祇園栽未合因地養初稠
苦節頭陀行虛心般若舟
禪餘金粉落定起籜心抽
渭葉慈雲護湘枝法雨流
斜穿瘞鴈塔高掛講經樓
色映苔

提靜陰連蒼藹浮護泥澆記日山偈刻支秋掛袖踈螢
度煎茶病鶴愁風播瑤瑣碎月磬和蕭颺玉版誰叅得
憑師問石頭

南山雜咏

湘潭千頃碧波明坐見南山秀色傾山雨欲來雲氣重
江鷗飛去釣船輕詩成多是琴邊興老去應憐物外情
閒喚小童敲白石不知芳草夜來生

峽山寺

竹裏維舟陟翠微
開門臨水欲歎巖雲生
佛殿飛來處
猿嘯山僧出定時
斷刻尚餘梁日記
古松猶偃漢朝枝
烟霞二妙應相笑
盛世藏珍負夙期

游羅浮

四百峯巒列海圖
飛雲絕頂敞玄都
丹砂五色時光燭
紫翠中天半有無
觀裏松株皆住鶴
山中竹葉盡成符
鐵橋歸去尋清賞
爛醉仙人白玉壺

瀧峽朝宗拱御臺
藥珠樓閣倚雲開
荔枝花落山鳩語

金
卷二百九十一
蘆橘子生江燕來黃野故居羊化石葛洪丹竈錦為苔
仙游倘遂凌風約羽服黃冠亦快哉

拜祖墓

芳草淒淒夕照前獨將春酒酌荒阡已嗟世事成千古
纔說清明又一年滿目江山增舊恨幾家榆火起新烟
從來俯仰傷懷抱不似于今倍黯然

重過林氏別業

曾侍先君訪太丘葛巾投老尚封侯青筠簾捲風生席

白紵歌殘月滿舟興發共吟鸚鵡賦酒闌重解鵲鸛裘
傳家幸有賢孫子別業新成似舊遊

陪翰林宋承旨遊鍾山

天上禪關敞薜蘿每緣休沐得經過雲籠梵宇青蓮濕
地接皇居紫氣多甘露結花凝木末醴泉和雨落岩阿
欲陪謝傳金屏約未解朝簪奈爾何

送張典籍訥之官大同經歷

邊陲見說青烽滅贊畫遙知白羽閒夜月葡萄氊帳底

春風簾簾柳營間賈生長是懷金闕定遠安能老玉關
沙漠年年飛羽捷想隨驃騎凱歌還

文章堂上論交日對榻哦詩白晝長晴日盡簾窺水映
暖風羅袂散天香尋常應制才堪並四十從戎髻未蒼
春半黃河冰片解旌麾幾日望燉煌

送劉方之入蜀

蛾眉西上穆陵關猶似簾櫳響珮環華月高秋沉楚館
綵雲清曉散巫山驚衿寄恨今宵永錦字傳情幾日還

惆悵風前花落盡相思惟有淚潛潛

餞宋承旨潛溪先生致仕歸金華

一自先生離禁闥玉堂清致更無人金蓮颺彩初寒夕
燕寢凝香散暮春著作有官惟故事論思此道竟誰陳
青雲志氣慚悲梗不覺臨岐淚滿巾

西樵

西樵山勢捲飛龍萬里扶桑海色通日麗錦巖開卷畫
雨餘銀渚漾芙蓉紫河車蔭仙人掌白鶴花明玉女峯

上相朝元鳴玉珮三城佳氣鬱龍蔥

乙卯除夕

四十今已過二年明日又復歲華遷
頭顱種種見白髮
生計落落仍青氈
梅花亂開客愁裏
雲物長迷鄉國邊
且可吟詩酌春酒
爛熳取醉東風前

鳳凰臺

綺翮十年去已遙
古臺猶見碧苔凋
楓林曉露迷三楚
柳陌春風暗六朝
狂客昔時揮彩筆
飛仙何處捻瓊簫

惟餘一道巴江水流向天門作海潮

送蔡九節還南安

幾年為客怕逢秋每見春來憶舊遊
歸夢夜隨寒雨急片帆春逐大江流
看山有興還堪寫惜別從來不改愁
斗酒殷勤拚一醉相思何處却登樓

西巖圖

為嚴彥恭題

欲寫滄浪愧不才畫圖今喜見君開
峯巒影落寒潭靜款乃聲從返照來
千頃白波龍伯國百重高興子陵臺

聞君早晚趨金闕風雨漁磯長綠苔

懷白雲山房

家住滄洲洲上山數椽茆屋亂雲間天晴疊嶂開金碧
雨過清泉響珮環高興別來長寂寞故人誰與共躋攀
洞門猿鶴應相問何事先生久未還

別妓

驪駒西上帝皇州斜抱雲和淚暗流子夜歌詞翻白雪
殘春風物似清秋青鸞信斷陽臺路翠被香寒燕子樓

七十二泉縈別恨
濟南煙樹綠幽幽

江上

江上清楓初著花
客帆和月宿蒹葭
過雲疎雨數千點
臨水小村三四家
風起漁船依釣石
潮回歸雁認平沙
秋懷已向南雲盡
又是滄洲閱歲華

金山寺

玄洲貝闕爛相輝
夾岸人家對敞扉
四壁波濤長觸石
孤山花木自成圍
橫江鶴向揚州去
泛櫓僧從建業歸

遷客憑闌重回首蓬萊雲氣曉熹微

秋風

秋風淅淅吹江亭汴河之柳猶青青
黃姑東渡會七夕白帝西來朝百靈
初開琪樹已云落遠別客愁今未醒
欲寫鄉書寄南鴈故園萬里天冥冥

虹縣九日登五女塚

五女峯頭烟樹荒登臨聊得散徜徉
忽驚重九今朝是却憶三千客路長
冷露餘花偏有色朔雲踈鴈不成行

寧教醉裏逢佳節且免醒來望故鄉

淮上憶京

去歲茲晨客帝畿
蔣陵西曲鴈飛飛
秋風叢菊開荒徑
落日浮雲滿翠微
老去吟邊芳物改
別來天上故人稀
登臨復對青樽酒
醒倚淮山憶禁闈

過范增墓

舊識荊州老將名
秋風此日過佳城
羣雄逐鹿留遺跡
稚子驅羊入廢塋
玉斗有聲松雪落
蒼精無影石麟橫

可憐牢落祥雲氣又向芒碭谷口生

思家

京華薄宦已沾巾寥落三年濟水濱
冷雨青燈吟客夢東風蓬鬢異鄉人
雲濤渺渺滄江暮榆柳依依旅邸春
朋舊別來多野興故園應已賞芳晨

南昌鐵柱觀

琳宮石筍露峯堯云是千年此鎮妖
方外羽衣能濟世城中仙梵亦通潮
蛟龍水底蟠金鎖鷄犬雲間聽玉簫

行橐已垂思點石祈靈壇上此逍遙

采石太白墓

冠屨何年墮世塵先生元是謫仙人春雲彩筆驚飛燕
暮雨滄江泣石麟牢落清名元不斁衰遲大雅竟難陳
脩然我亦狂吟客思殺風流賀季真

望廬山二首

扁舟夜泊潯陽岸隱約香爐五老巔紅葉天燈飛鳥外
白蓮僧社斷猿邊蒼崖影合東林寺銀漢光連瀑布川

卷二百九十一
亦有宗雷違四相千峯無路訪羣仙

東林佛閣倚岩堯蘿逕逶迤傍石橋松栢千章連左蠡
芙蓉萬疊倚層霄琪花雪影江心見蓮社天香世外飄
歸老倘酬仙賞願藍輿寧待遠公招

至儲潭廟留題

五老峯微楚路分
潁灘猶禮洞庭君
行空鐵馬寒嘶霧
帶月蒼龍夜吼雲
瓊佩倩誰招帝女
桂漿聊復奠靈氛
清吟寄遠成孤絕
思入滄江白鴈羣

思家古河

古河烟草暗南天
此去鄉園路幾千
燕子來時春寂寂
海棠開後雨綿綿
滄江水遠吟詩社
綠渚花明載酒船
更憶故人王給事
愁來書破薛濤箋

紅菊

龍山九日宴斜曛
萬朶秋香散彩雲
醉岸綸巾對芳物
西風應識舊參軍

紅梅

丹青學寫壽陽姿
艷杏仙花嫩柳枝
猶記醉邀何水部
淮西歌吹舊臺池

墨竹

洞庭春盡水溶溶
錦瑟輕寒起卧龍
行客欲投蒼水佩
亂雲遮斷九疑峯

誰拈秃筆寫淒迷
亂石橫江碧玉低
猶記畫船初泊岸
落花時節郭公啼

歲蕤萬玉曉撐風
應是清溪野水東
更畫接離顛倒著

嫩涼添我綠陰中

王孫圖

誰拈金彈倚青驄
鞍面開元結束同
好似華清二三月
綠陰籠仗入離宮

東風馳道直如絃
琪樹春陰護馬韉
從幸少年初賜錦
數聲啼鳥落花前

宣和樹

上林芳樹靄崇宣
淡墨踈翎膩粉牋
何似白榆棲凍雀

蕭蕭風雪滿初連

昭君

玉顏啼淚濕龍沙
東望長安不見家
月滿穹廬愁似海
強將心事付琵琶

題葡萄

驪龍弄影照高秋
萬斛真珠露氣浮
還憶玉人歌舞散
紫駝銀甕出涼州

雜畫

曾記東林信杖藜
遠公門對石橋西
長松月落猿聲歇
贏得青山似虎溪

四皓圖

只合食芝老萬山
誰教鶴髮動龍顏
蛾眉對酒歌鴻鵠
怨入商林紫翠間

松

雙松如蓋倚雲長
曾憶匡山問草堂
拂石坐來龍影濕
半陂春雨茯苓香

送翰林宋先生致仕歸金華

紅韉金帶荔枝花三品詞林內相家歸去山中無箇事
瓦瓶春水自煎茶

寄高彬

條風吹綠蒲蟾溪蠟屐行春日向西獨木橋邊烏桕樹
鵲鳩飛上上頭啼

寄王彥舉

綠楊陰下玉驄嘶絲落銀瓶帶酒攜夢入南園聽夜雨

不知身在蔣陵西

憶得

憶得初年不解愁
藥欄花遶日風流
臨池書罷黃庭帖
走馬城南覓舊遊

龍江夜泊

蔣山山頭秋月明
龍江江上暮潮生
行人又是金陵客
卧聽西風鼓角聲

過揚州

垂楊空有折殘枝
春盡瓊花作雪飛
少日往游今是夢
竹西歌吹舊臺池

下邳

淮南五月叫春鳩
花落清河錦浪流
偏恨寂寥鄉思裏
淡烟寒月下邳州

呂梁洪

驚濤觸石雪潺潺
五月河風尚作寒
問訊南來荆楚客
官船幾日到淮安

武城

獨上荒城野日陰
絃歌千載憶遺音
黃堂皂蓋成塵土
何處春風綠綺琴

姑蘇開元寺

梵宮春盡落花時
倦鳥猶啼竹樹枝
想見風流唐太守
綠陰亭院坐題詩

次張仲舉韻

江上依稀栗里峯
峯前隱約故園松
征鴻盡向南天沒

不為離人寄一封

幽居雜詠

仙衣自種一池荷
采采青黃當綺羅
怪底近來秋氣早
水禽飛去晚霜多

紈綺紛紛幾戰場
閒身贏得水雲鄉
扁舟日暮鳴榔去
付與沙鷗管夕陽

遠公蓮社久相招
老大無心到石橋
遙想東林山月出
白猿啼處樹蕭蕭

野吟詩句出天成景物如雲眼底生白石江頭烏桕樹
夕陽踈冷鶉鳩聲

鶴背腰纏有幾家陶潛貧薄太無涯青鞋布襪歸來好
却使無錢對菊花

秋閨思

涼夜蕭蕭處處過玉樓高起逼天河西風瘦盡梧桐葉
添得西窗月影多

踈檣鐵馬亂風飄火冷金鳧百和銷怪底芙蓉清漏永

不知何事苦迢迢

閨怨

都門不去亦何妨行色匆匆有底忙
欲向碧桃花樹底牽回白馬紫遊韁

寄語多情燕與鶯莫勞花底弄春聲
千吟萬轉知何益空使寒閨夢不成

晚思沉沉倦倚闌玉簫聲歇酒闌珊
淡雲還掩初生月誰護梨花作夜寒

誰識沅湘路幾千
臺魂夜夜到君邊
春光不管愁人恨
故傍楓林叫杜鵑

薄寒猶可夜藏闌
向晚那堪獨倚樓
是著人衣添懊惱
海棠枝上月如鉤

接得封書妄自開
分明說與便歸來
千回枕上聽春雨
幾度階前掃綠苔

舊栽楊柳色氤氳
千里渾忘寄一緘
春鴈高飛惟向北
不知遊子在江南

金
卷二十九
欲掃驚牋寫綠雲
惟將心思怨夫君
蜀山花竹湘潭雨
杜宇春深獨不聞


洞庭暮雨起春波
翠旆金旌帝子過
遙想泊舟明月渚
夜深欹枕聽雲和

湘江兒女單紵衣
娥皇廟前歌竹枝
春來只會閑相惱
不管人家有別離

五言絕句一首

鼉鼓三聲急
西山日又斜
黃泉無客舍
今夜宿誰家

明興雜記云高皇誅藍玉籍其家凡有隻字往來
皆得罪蕢因與玉題一畫故殺之此詩乃絕命也
上問監殺指揮孫蕢死時何語指揮以此詩對上
怒云彼有此好詩汝乃不復奏而殺之何也竟殺
指揮郡邑傳云皆謂蕢死以梅思祖非藍玉豈雜
記別有考與



石倉歷代詩選卷二百九十一

欽定四庫全書

集部

石倉歷代詩選卷二百九十二

詳校官庶吉士臣龍廷槐

侍讀臣孫球履勘

總校官進士臣朱鈐

校對官中書臣范來宗

謄錄監生臣李鳳丹

欽定四庫全書

石倉歷代詩選卷二百九十二

明 曹學佺 編

明詩初集十二

高啟

上之回

聖主重行幸六蚪法乾旋北巡初避暑東祠已祈年羣
官從清塵粲若星麗天前揚豹尾竿左靡魚須旃瀚海

通漢月蕭關絕胡煙願奉千齡樂皇躬長泰然

君子有所思行

騁望京輔地金城千里餘
戕戕松柏陵靄靄桑柘墟
明堂表青陽飛觀切紫虛
況有戚里第高樓夾清渠
愛妾舞羅縠嬖奴鳴珮琚
東園賜祕器上林乘副車
玄運有恒旋盛時無久居
勿嗤城南巷寂寞揚雄廬

長門怨

憎寵一時心塵生舊屋金苔滋
銷履迹花遠度鑾音暮

雀重門迴秋螢別殿陰君明猶不察妬極是情深

塞下曲

日落五原塞蕭條亭堠空漢家好遠略籍役滿山東去年出飛狐今年出雲中得地不足耕殺人以為功登高望衰草感嘆意何窮

羅敷行

陌上三月時柔桑多綠枝攜筐行采葉日暮畏蠶饑君來駐車馬相逢在桑下謾說同心言不是知音者君貴

多輝光妾賤無紅妝自信田間婦難從天上郎長安畫
樓宇無限如花女使君當早歸莫共羅敷語

王明君

都門塵拂春風面臨別看花淚如霰君王惆悵惜蛾眉
不是前時畫中見白髮呼韓感漢恩寧胡謾號關支尊
羶裘肉食日勝貴不如但嫁巫山村黃沙白雪無城闕
手冷鴟弦夜彈歇相隨萬里到穹廬只有長門舊時月

行路難

君不見盤中鯉暫失風波登俎几君不見枝上蜩纔出
糞壤凌雲霄推移變化詎可測勿謂明日同今朝出乘
高車入大馬半是當年徒步者范叔曾逃客溺餘衛青
亦在人笞下悠悠行路莫相欺為雌為雄未可知

怨歌行

妾始充下陳嬌容常自持上宮三千妓一一妒蛾眉
急有斷聲鏡暗無妍姿遂令開時花遽作落後枝昨夕
歌吹歡今夕蛩語悲從來班婕妤不勝趙昭儀

蒿里

素驂駕廣柳蕭蕭出城闔玄廬儼象設猶恐死有神古
原閉愁冤荒草不得春一作泉下客長違室中親昔興
每待旦今卧焉知晨斂衣已成灰含具仍作塵家門諒
不遠欲歸竟何因平生所愛物娛玩由他人哀哉此里
中同逝壯老均聖賢亦豈免聞道庶可珍

少年行

下直平明出禁門千場縱賭共王孫寶刀不敢將輸卻

明日沙場欲報恩

長相思

長相思思何長愁如天絲遠悠揚搖風曳日不可量不
能絆去足惟解結離腸關山碧雲看欲暮空幃坐掩荃
蘭香長相思思何長

雙桐生空井

雙生碧玉樹竝覆黃金井根通夕潤深葉帶朝光冷應
有感秋人時來鑑愁影

征婦怨

良人不願封侯印虎符遠發當番陣幾夜春閨惡夢多
竟得將軍軍覆信身沒猶存舊戰衣東家火伴為收歸
妾生不識邊庭路尋骨何由到武威紙幡剪得招魂去
只向當時送行處

車遙遙

鷓鴣啼霜海城白征夫趣裝牛上輓天生兩轂轉長途
那得令君不為客出門已遠第一程耳中鳴鐸漸無聲

房戶寧嗟寂寞守山川惟念苦辛行欲車不行願車覆
還愁損我車中玉安得身如路傍草相隨千里車前綠

邯鄲才人嫁為廝養卒婦

妾能擬趙瑟舊得君王眷更衣直夜房侍酒登春殿出
宮非故顏里婦猶相羨叢臺罷往夢破屋流螢見末路
多若斯紛紛貴成賤

秋江曲送顧使君

秋江月滿秋潮大江上行人待潮過別離休說渡江難

半日順風船穩坐
楚江茫茫葭蒹平
使君來時雄雉鳴
子弟從軍隔江去
幾家猶住夕陽城
水田雖荒飯常足
芟米夜舂二十斛
誰道繁華不及前
戶無征稅官無獄
渡江渡江君莫留
江北樂似江南秋

寒夜吟

月下凍痕生綠井
隔簾霜片飛無影
樹枝風息轉迎寒
愁人如鳥棲未安
夜短夜長應獨覺
熒熒殘燭鳴鳴角

春江行

春江南北疑無畔綠草綠波連不斷一女紅妝出浣紗
恰如鏡裏見桃花袂衣猶冷過寒食雲渡春陰半江黑
浦口風多潮正深輕舟搖蕩似人心鷓鴣暮啼歸路遠
飛絮茫茫楚江苑

養蠶詞

東家西家罷來往晴日深窻風雨響二眠蠶起食葉多
陌頭桑樹空枝柯新婦守箔女執筐頭髮不梳一月忙
三姑祭後今年好滿簇如雲蠶成早簷前繰車急作絲

又是夏稅相催時

採茶詞

雷過溪山碧雲暖幽叢半吐槍旗短銀釵女兒相應歌
筐中摘得誰最多歸來清香猶在手高品先將呈太守
竹爐新焙未得嘗籠盛販與湖南商山家不解種禾黍
衣食年年在春雨

擬古

嵯峨雲間樓俯視層城陰綺戶相洞開清飈拂羅襟上

有離居婦哀歌撫弦琴不知中怨誰掩抑一何深初為
郢中唱再奏邯鄲吟不惜努力歌寫作絕代音風吹落
君耳萬里知愁心曲盡思寂寥青天日西沈

其二

東井不可飲威弧孰能張虛名竟何用千古同悲傷與
君初結歡金石比中腸恩情忽乖分相望阻川梁閨門
尚難越況彼道路長不如雲中雁迴飛自隨陽

其三

美人一相見遺我白玉環上有雙雕龍遊戲在雲間持
此感深意佩結無時間玉以比貞潔環以明不絕雲龍
永相從誰能使離別

其四

黃鳥鳴春陽流芳滿西園攀條日已暮悵惋不能言禦
寒必重裘涉道斯雙轅離居非君子何以解憂煩煩憂
日已積佳期日已失思君如蓬萊可望不可即區區儻
見察憔悴甘自畢

寓感三首

蚩蚩此羣氓幾人出其儔誰云抱智慮乃足資勞憂晨
秣思遠騁宵披務窮搜懷古復慨今百念紛自投膠擾
得喪間若與方寸仇安知廣成子冥卧崑崙丘無營亦
無想八表獨神遊

攬轡登太行遙望落北州峭函正西峙黃河復東流百
城無遺堵雲煙莽相繆朝作冠蓋塲暮為狐兔丘昔人
爭此地干戈迭相讎當其得意時連陌擁鳴騶百年奄

忽盡魂魄空來游曷見采芝叟冥棲無所求

顏陽在川上玄蟬夕鳴悲嫋嫋風起波翻翻葉辭枝曠
望天宇內沈寥此何時朱火已盈謝清商屆其期覽鏡
忽自嗟綠鬢生素絲萬物有榮悴造化豈吾私

始發南門晚行道中

歲暮寒亦行征人有常期辭我家鄉樂適彼道路危酒
闌別賓親驅車出郊岐我馬力未瘳已越山與陂回頭
望高城落日雲樹滋遭亂既少安謀生復多饑途逢往

來人孰不為此馳遠游亦吾志去矣何勞悲

渡浙江宿西興民家

掛帆無天風到岸日已夕捨舟理輕裝欲問古鎮驛
颿颿聲迴莽莽山氣積僕夫夜畏虎告我勿遠適望林
投人家炊黍旋敲石寒眠多虛警我體若畏席誰云別
家遙數日已在客今宵始驚嘆東西大江隔

夜抵江上候船至曉始行

夜辭西陵館霜谷猿叫歇津卒未具舟天險不可越漁

商雜候渡寒立沙上月蒼煙隱遙汀益覺湖漲闊開橈
散驚鳧海色曙初發朧朧前山來稍稍後嶺沒中流聞
鼓角隔岸見城闕客路得奇觀臨風悶俱豁

宿湯氏江樓夜起觀潮

舟師夜驚呼隔浦亂燈集潮聲若萬騎怒奪海門入初
來聽猶遠忽過睇無及震搖高山動噴灑明月濕霜風
助翻江蛟龍苦難蟄應知陰陽氣來往此呼吸登樓覺
神壯憑險方迴立何處望靈旗煙中去波急

雜咏

朝臨高堂上俯仰崇岡下春暉何悠悠清川自東瀉陽
和發卉物時澤均播灑如何及芳晨蕭條俱空野願言
釋拘局登高騁吾馬曠地不見人憂心何由寫興謝固
其常吾將尤誰者

題綠綺軒

幽抱時欲寫帷中有鳴弦一彈落一葉庭樹坐蕭然寂
寂山水夜迢迢河漢天憶聽烏啼起南軒秋未眠

登景閣夜宴

王孫喜留宴開閣望明河是夕月微暈涼風池上多棲
禽翻暗叢駭魚動圓波清景厭絲竹雅詠答高歌尊酌
願勿間良宵易蹉跎預憂別在旦車馬層城阿

暮歸

朝出雞始啼暮歸鳥欲棲我身本無役胡為亦東西徒
步二十年風埃面空黧入門聞鄰杵秋氣凜以淒芙蓉
墜廢沼絡緯鳴中閨壯志苦不遂歌吟夜燈低富貴固

有日我志焉能迷笑向細君道勿為翁子妻

送蜀山人歸吳興兼簡菁山靜者

南浦無碧草征鴻晨稍飛何當杪秋節臨水送將歸既
來不能淹君心應好違惻惻袂始判遙遙帆已微天高
桂樹落人在山中稀還尋同袍者更製薜蘿衣

會宿城西客樓送王太史

君來歡不足君去憂何遽共聽楓橋鐘留連恐將曙蛩
鳴故苑草鳥起高城樹明日獨登樓歸帆渺何處

出郊抵東屯二首

朝服久已解，儼然山澤臞。欲狎林野人，相歡混賢愚。朝來此水濱，高歌步踟躕。忽逢一田父，舍耕拜路隅。疑我是長官，恠我體貌殊。我已釋所有，彼我未忘歟。

坐久體不適，卷書出柴關。臨流偶西望，正見秦餘山野。淨寒木疎川，長暝禽還此。中忽有得怡然，散襟顏。

鳴山書舍圖為黃君伯淵賦

伯鸞嚮春地，井臼有遺跡。之子學幽棲，托蹤在林石。清

風竹林曉片月蘿逕夕遙想一齋空圖書滿牀積

春草軒雨中懷王太史

西軒罷琴坐涼思欺白苧颯颯樹聲繁秋風滿池雨蓮
衰少暗馥禽靜多幽語對此闕良儔當歡反傷緒

次徐山人與倪雲林贈答

昔遊紫藤塢空山鶴鳴秋相望隱人居興闌竟回舟邇
來獲晤賞玄談劇風流每欲開南軒招我共偃休天寒
鴻鴈鳴菱荷落長洲豈無一釣船訪子溪水頭終慚文

墨牽只尺成阻修聽雨掩閣卧觀泉上巖游朝覽贈答
篇詞藻誇兩優我本丘壑人猿鶴肯見留擬結歲宴期
壺觴展綢繆況聆西澗濱禪宮闕清幽夜看太湖月遲
我同登樓

蘭室為袁省郎賦

湘臯春水深澧浦秋風早如何庭戶間芳蕤獨妍好不
有君子心憔悴同芳草

題曹氏春江雲舍

遙波靄微雲禽寒少相語君家在空濶欲往迷洲渚紛
紛樹離霧稍稍花滴雨日暮坐相思江東渺何許

蘿徑

幽溪入蘿蔦幾曲到巖扉夏鳥頻啼處陰陰花墜稀知
當煙暝後從此荷樵歸

茶軒

摘芳試新泉手滌林下器一榻鬢絲傍輕煙散遙吹不
用醒吟魂幽人自無睡

過立公房

空院閉深竹幽花發孤妍春陰鳥語寂風磬時泠然非
茲絕塵地何以寄高禪

送芭上人東歸

浮雲如飛鳥相聚安可常偶來雲巖寺幾日共徜徉我
去師亦歸澗戶欲荒涼池卧孤塔影庭棲雙桂香重過
應未期悠然山水長

送王主簿之歸安

我歌柳惲詩送子南汀發山城逢社雨綠樹啼鶯歇留
連孤艇遲悵悵雙壺竭高士尚為薄休慚府中謁無事
坐閒廳彈琴看明月

用里村

高皇本壯士提劍定四方晚為兒女情悲歌起彷徨愛
子欲建儲寵姬方侍側顧驚四老人謂已成羽翼大臣
豈不諫孰能幹天機彼翁何為者足見人心歸始潛避
秦君終出安漢嗣世羅馬能羈舒卷聊自肆我來用里

村如入商顏山紫芝日已老黃鵠何時還斯人神仙徒
千載形不滅猶想蒼巖中白頭卧松雪

毛公壇

欲觀漢壇符東上縹緲峰葛花墜寒露夕飲清心胃月
出太湖水鶴鳴空澗桐真境久寂寥蒼苔閱靈蹤嘗聞
綠毛叟變化猶神龍世人豈得見偶許樵夫逢攀陰力
易疲探玄志難從歸出白雲外空聞仙觀鐘

西齋池上芙蓉

池荷已衰颯孤艷仍獨在滄洲遠夢違風露妍姿改窈窕徒自媚寂寞還誰待此地托根偏非無美人採

客有不樂者

客有不樂者默坐空堂幽明燈照孤影對酒不能酬風雨忽夜至單衣颯驚秋葉隕已憾憾蟲鳴尚悠悠於當屬有念苦願君聲收讀書仰千古命駕志九州孰云吾多智有已不解謀冥飛既難攀苟得亦可羞

天平山

入山旭光迎出山月明送十里松杉風吹醒塵土夢茲
山凡幾到題字徧巖洞陽崖樹冬榮陰谷泉下凍怪石
立誰扶靈草生豈種白雲翥然來諸峰欲浮動高鶻有
危樓幽禽無俗哢凌蘇知履滑披嵐覺裘重嘗登最上
顛遠見湖影空漁樵出渚孤鳥雀歸村衆還尋老僧居
隔竹聽清誦憫我躋攀勞為設茶筍供幾年歷憂歡造
物若擲弄迷途遠山林遲暮堪自訟難追謝公游空發
阮生慟身今解組紱明時愧無用閒持九節筇尋訪事

狂縱石屋秋可眠山猿許分共

送張文學之樵李

回川帶綠樹窈窕雙鳴禽江郭去非遠傷離空滿襟林
中古殿靜池上高齋陰應想彈琴士杏花春雨深

越來溪

溪上山不改溪邊臺已傾越兵來處路流水尚哀聲昨
日荷花生今朝菱葉死亡國不知誰空令怨溪水

南峰寺

樵歸衆山昏天峰尚餘影欲投石門宿更度西南嶺遠
聞雲間鐘蘿逕入寺水懸燈照靜室一禮支公影鳥鳴
澗壑幽泉響窗戶冷對此問山僧何如沃州境

寒泉

遠絡叢峰間平流盤石上月照欲成潭風吹不生浪聲
兼寒葉下色映秋苔漲野客照羸顏曾來倚筇杖

支遁庵

閒登待月嶺遠扣棲雲關石室閉千載高僧猶未還殘

銓黃葉下古座青苔間不見跣趺影鶴鳴空此山

靈巖寺響屨廊

君王厭絲竹鳴屨時清耳獨步六宮春香塵不能起那知未旋踵麋鹿游遺址響沈明月中跡泯荒苔裏

夜飲余左司宅得細字

春會非有期春愁本無際焉知君子堂此夕相與詣燈銷月窺欄角警霜委砌舞影憐鶴長吟聲笑蠅細鄰雞易催旦共歡休復寐喪亂得幽歡疇云匪良計

劉凝之騎牛圖

夫子初亦仕，弦歌潁之潁。園廬忽在念，解綬言歸期。方春養孤犢，既耕亦以騎。春風草茫茫，出游徧山陂。田家有美酒，輒醉不復疑。當昔天聖間，實號休明時。豈無理人術，終恐塵鞅縻。嗟今屬喪亂，懷策競欲施。清芬遠莫挹，載誦廬山詩。

剡原九曲四首

欲知溪流長，百轉來越嶠。舟行安能極，嵐路入斜照。清

景不足娛昔人豈辭詔石硯久難磨空林閉遺廟

山折水颯旋山開水仍往東陂堰初成秋色瀾然廣碧
蘿花茸茸月映石壁上何時試沿洄一理煙中舫
密篠覆碕岸石穴黝而深居人負薪歸駐聽風水音回
看蓮花峰靄靄生夕陰不有僧鐘來高路誰能尋

危梁渡清瀨逶迤入前渚犬鳴樹蒙籠煙景暗墟聚雨
中耕叟歌月下歸人語欲尋仙尉蹤淒涼一茅宇

懷徐七

哀鴻已鳴渚落葉初覆陌故園當授衣却思遠行客客
行已日遠我思日已積東南望歸棹鳥去煙波夕憂來
不成言懷抱空戚戚豈無一尊酒黃花為誰摘

獨步登西丘

幽卧意不適出門聊獨行惻惻田野中斜徑多不平逶
迤登遠丘迢遞望高城風交二麥動煙迴孤花明偶逢
植杖翁疑是古耦耕欲問恐相誚歸來悵中情

柳絮

輕盈易飄泊思逐春雲亂已拂武昌門還縈灞陵岸沙
頭雀啄墮水面魚吹散官樹曉茫茫哀歌腸欲斷

送蕭隱君自句曲經吳歸維揚

適從江東來復作江北去來去逐江雲蕭蕭舊巾屨身
帶煙蘿雨初下大茅峰孤帆拂楚樹遲聽廣陵鐘去家
忽來歸憐君似黃鶴日暮渺相思淮南桂花落

賦得真娘墓送蟾上人之虎丘

色相終壞滅佳人能久妍斷碑山寺裏小冢竹林邊蘭

葉春風帶苔花暮雨鈿情留吳苑客夢逐楚臺仙高僧
方宴坐身在散花天

送倪雅

交游結深歡離別生遠念聊持毛子檄暫脫劉生劍南
風柳下亭杯動江色艷山遙馬望驛日落蟬鳴店此去
漸成名驅馳君勿厭

秋日山中

山澤含霧雨偶來若居夷我無遠游志何與親愛離暑

退初可喜秋來轉堪悲壯顏豈草木憔悴同此時中心
與百憂日暮如有期悄悄出空宇悠悠適荒陂阮窮勿
復嘆天欲昌吾詩

宿幻住棲雲堂

窗白鳥聲曉殘鐘渡溪水此時憂夢迴獨在空山裏松
巖留佛燈葉地響僧履余心方正寂無使羣動起

曉起春望

今朝有春意原野晴始綠疎花未破煙新禽稍鳴旭物

情各欣榮客意胡刺促居閒厭寂寞從仕愁羈束兩事
不可齊人生苦難足安得長放歌花開酒醅熟

陳氏秋容軒

西郊莽迢遞川樹凝煙景雨過落紅蕖斜陽半江冷蟬
鳴山欲暗鴈去天逾永孤客對蕭條應嗟鏡中影

雨中遣興

積雨坐無悶端然便寂寞好鳥不頻啼閒花最遲落行
園每度徑望岫時登閣只此可終朝何當有樽酌

聞鐘

迢迢煙際發，隱隱巖中應。
初來覺寺遙，乍歇看山暝。
惆悵未眠人，空齋幾迴聽。

池上晚

春晚思悠悠，閣前池水流。
新蒲風葉響，如對野塘秋。
野塘前歲路，已隔歸舟度。
鳥下獨回頭，青山杳然暮。

醉歸夜醒聞雨

覺來聞雨聲，燈輝耿殘夜。
窗間有危葉，暗助瀟瀟下。

記醉歸時寢齋如客舍

和張羽懷吳興舊游之作效其體

城貫綠川長朱閣映飛梁鶯嬌山唱度蓮豔水嬉張花
童搦翠管桑婦挈銀筐若溪酒脂碧顧渚茗旗香擇勝
事未厭驚亂意俄傷回看舊游地秋草變淒涼

綠水園宴集

平居寡良會艱哉況茲時幸逢金閨英中筵接光儀名
園遇修禊景麗春陽熙綠芷榮曲沼朱華敷廣墀情宣

寄高文憂襟為之披瀝來不敢訴慮此朋歡虧何由淹
返旆顏光願遲遲

送程較理游江上

風亭裊離管草綠江水暮送此南浦人孤帆雨中渡別
傷足自緩前驛花滿路春叢戀山鶯晚絮迷汀鷺我今
獨愁居芳月誰與度佇立望遙波相思積煙霧

僧齋聞雨

寂寂初罷語悠悠未成眠高齋有春雨夜半落燈前已

傷花委樹復臆水盈田老衲獨無聽繩牀方坐禪

見耕者

茲晨有佳興挈杖行遠墟春耕稍已出土脈向暖舒嚶
嚶鳥囀谷瀏瀏泉鳴渠歲功自茲始為農亦良勗而我
情四體偃息在敝廬饑匱固當爾無為嘆踟躕

雨中書湖上漁家壁

漁舍煙不起瀟瀟雨初暝孤客與羣鷗寒依葦間聽山
昏望易失波動愁難定歸思滿蒼茫空憐去帆迴

至蓮村

昔愛茲里幽誓將構蓬廬孰云墜世網重到十載餘喪
亂喜獨完煙火靄舊墟柴門在深巷落日榆柳疎鄰翁
念契濶攜筐饋雙魚苦問客何事顏貌與昔殊焉知涉
艱難多戚長少娛貧賤非所恥中情在閒居願翁勿相
誚終當遂吾初

雨中登白蓮閣望故園

亭亭高閣上渺渺清川曲日暮靄羈愁離蘅雨中綠聞

鐘僧已返荷笠人猶牧歸棹獨難尋江南望雲木

尋照公

遠尋林下僧不識林下路隔雲孤磬響因到繡經處相對竟忘言夕陽在祇樹

遊靈巖賦得越來溪

越女游未去越兵嗟已來青山舊溪上無復見樓臺過客空惆悵荷花秋自開

雨中客僧舍

客夢方甦適竹間風雨驚起登林端閣迢遞望層城景
寒川樹踈野晦原煙平不邀釋子語何以緩羈情

東坡路上阻水

不覺去村遠瀟瀟柳間步江雨夜來多春流稍侵路寨
裳自可涉不待漁舟渡

始聞夏蟬

翻翻纔得蛻咽咽未成喧翳葉誰能見南風綠繞軒乍
驚變節物還念別郊園何待當秋聽方令羈思繁

將往海上舟行雨投僧舍

沙響聞雨來中途生旅愁
遙尋晚林磬暫駐寒塘舟
窗下一僧老竹間雙鳥幽
誰言阻遠去翻使得佳遊

江上晚晴

江虹斷雨脚返景明
虛理宿鳥亂歸村
幽人獨臨水漁舟隔浦飯
烟火蘆中起閒吟望遠岑
緩步尋芳芷此夕遇新晴
憂懷偶然喜

冒雨暮歸過白沙湖

天寒滿湖雨獨棹東歸急遙望水邊村蕭條暮煙濕家
人應候我深暎柴局立

送袁憲史由湖廣調福建

只謂遠游苦寧知遠游樂君今萬里歸顏色殊不惡自
言楚帆開初別鳳凰臺采石月下過匡廬天際來試沽
彭澤酒憔悴陶家柳最愛小姑妍臨行復回首遠逐繡
衣游閒登黃鶴樓千峰漢陽晚一鴈洞庭秋西上荆門
渚銀釵見巴女歌斷竹枝詞江陵夜風雨看盡幾多山

今朝始得還秋風吹驛騎又欲度閩關閩關聞更好瘴
霧晨收早椰子美如漿蘭花多似草嗟余戀故鄉不肯
涉津梁把酒看君去相思空斷腸

曉卧丁校書軒

窗月澹欲失矚矚逼初曙屋外鳥聲多應知有嘉樹殘
香掩幽寢未事澄紛慮頗似宿東巖僧齋竹深處

水上盥手

盥手愛春水水香手應綠紵紵細浪起杳杳游魚伏怡

悵坐沙邊流水去難掬

秋日端居

秋意日蕭索郊園霜露餘出游無山水聊復守吾廬巷
輒久已斷山瓢仍屢虛非甘寂寞者誰樂此閒居

晚步游褚家竹亭

落日猶半野閒來潭上游非因戀幽賞聊欲散煩憂澄
波魚噉夕荒竹鳥吟秋不是愚溪上胡為吾久留

早發土橋

空山遠無驛逆旅聊可宿懷征候鳴雞燃帶續我燭僕
夫昨行苦爛漫睡正熟呼之愧怱怱推車出茅屋高巖
尚懸斗深谷未升旭欲亟去仍遲怪石暗崩觸思當在
家樂日晏始舒足胡為此行邁霜露勞局促王事靡敢
辭非關徇微祿

寓天界寺雨中登西關

片雲出鐘山陰滿江東曉幽人閣上寒風雨啼鷺少紅
塵禁陌淨綠樹層城繞不為怨春徂離懷自憂悄

送陳四秀才還吳

君是故鄉人同作他鄉住同來不同返惆悵臨分處手
把長干花回望長洲樹恐起憶家心愁題送君句

送周四孝廉後酒醒夜聞鴈聲

別時酒忽醒客去惟空舍風雪鴈聲來寒生石城夜遙
憶渡江船正泊楓林下

洪武二年八月十三日元史成中書表進詔賜
纂修之士一十八人銀幣且引對上獎諭擢

授庶職老病者則賜歸于鄉閱二日中秋諸
君以史事甫成而佳節適至又樂寵賜之優
渥而惜同局之將違也乃即所寓天界佛寺
之中庭致酒為翫月之賞分韻賦詩以紀其
事啟得衢字云

聖主念前鑒述作徵名儒羣來高館間廁跡愧我愚孰
謂此責輕毫端有褒誅書成進丹陛召對共拜趨去留
雖不同雨露均沾濡已淹三時勞可廢一夕娛況逢端

正月當空照蒼鬚流光滿金界境與人間殊廣庭布長
筵嘉肴薦芳腴豈惟多士集亦有名僧俱興酣貴形忘
諧笑不復拘矚行豈辭數仰看轉斗樞明晨即分袂此
樂誠須臾

答定水寺芭公

日晏初出院閒齋一蕭然忽枉名僧書始知在清泉憶
昔雲巖居共締林中緣夏陰繞澗吟秋霽開閣眠睽合
苦難常別來歲頻遷趣同貴道在跡異慙名牽明日出

東海想照空山禪無因荷衣襍往禮高峰前

過白鶴溪

昨發白鷺洲今過白鶴溪溪流幾迴轉只在晉陵西月
出女猶浣雲深猿自啼茅峰雖咫尺無計躡丹梯

至吳松江

江淨涵素空高帆漾天風澄波三百里歸興與無窮心
期弄明月迢遞辭金闕晚色海霞銷秋芳渚蓮歇久別
釣魚磯今朝始拂衣忘機舊鷗鳥相見莫驚飛

始歸田園

辭秩還故里永言遂遐心
豈欲事高蹇居崇自難任
清晨問田廬荒溪尚能尋
秋蟲語左右翳翳桑麻深
別來幾何時舊竹已成林
父老喜我歸攜榼來共斟
問知天子聖歡然散顏襟
相期畢祖稅歲暮同謳吟

答張院長雨中見懷

林園寢扉掩閒坐道心生
山藥翻寒色塘漪含曉清
乍違枉芳札遠憶愧深情
此日知同寂梧窗聽雨聲

施澤阻風

客行阻風濤捨舟步江側芳村經戰餘草木盡愁色夜
投土屋中月出林半黑燃薪燎我衣炊黍作我食夜長
關塞寒歸夢何由得遙想倚閭親中宵淚橫臆

石倉歷代詩選卷二百九十二